

DOMENIE XXV «VIE PAL AN»

Jutoris pe Liturgjie

Domenie, ai 23 di Setembar dal 2018

Come che o sintarìn tal vanzeli, Marc al met in evidence la preocupazion e l'azion di Gjesù: rindi cussients i dissepui de tragjedie - lu coparan - che i tocjarà. Ma l'evangjelist al vise: Lôr però no capirin chestis peraulis e a vevin rivuart a fâi domandis. Noaltris o saressin stâts compagn. Forzit a saran di daûr ancje lis primis comunitâts cristianis che e vevin di presentâsi in public cuntun messie condanât al suplizi malfamât de cros. Cert che Gjesù al lasse di bande la int, si compuarte di clandestin, par vie che al jere daûr a inscuelâ...

Al sarès ben fermâsi a contemplâ chest om, chest Fi dal om, chest Diu fat om in chel marum che lu varà compagnât di bessôl ogni dì e in chê fede colme di fiducie che e traspâr in ducj i siei discors.

Ancje il seguît dal vanzeli: a vevin cuistionât fra di lôr sun cui ch'al jere il plui grant, nol è che al consoli. O sin ben lontans de mentalitât dal Signôr e di chel so amôr che, te antifone i fâs dî:

Antifone di jentrade

Jo o soi la salvece dal gno popul, al dîs il Signôr.
In cualunche tribulazion mi clamaran,
jo ju scoltarai e o sarai il lôr Signôr par simpri.

Colete

Diu, che tu âs fondade dute la tô sante leç
sul amôr par te e pai fradis,
danus la gracie di meti in vore i tiei comandaments
par podê rivâ a la vite eterne.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Sap 2,12.17-20

Condanìn il just a une muart vergognose.

Chescj che o sintarìn a son i discors dai disonescj, passûts, legris e triscj dal secul I p.d.C. a Alessandrie d'Egjit. Dome che a fâju no jerin dome i paians, ma - nus bute in muse ce ch'o fasìn cuintri de leç – ancje i Ebreus che a voltavin bandiere lant cui paians; e duncje, fradi al copave fradi. Ma, e cui ajal perseguitât Gjesù? Chei dal so popul. E la struture glesiastiche trops delits no ae cometût proprît cuintri i siei cristians?

Al somee che lis peraulis che a disevin a Alessandrie, ai timps di Gjesù e des primis comunitâts cristianis, a continuin a passâ di secul in secul, di teren in teren e a sedin simpri veris. Veris so redut vuê cuintri dai miârs e miârs di martars cristians.

Dal libri de Sapience

I triscj a disin:
«Tindìn palissis al just, parcè che nus intrighe,
si met cuintri des nestris voris,
nus bute in muse ce ch'o fasìn cuintri de leç
e nus cride parcè che o lin cuintri
di cemût che nus an tirâts sù.
Viodìn mo se lis sôs peraulis a son veris
e provìn ce che i sucedarà tal ultin.

Se il just al è propit fi di Diu, lui i darà une man
e lu liberarà des mans dai nemîs.
Metînlu a lis provis cun ofesis e cun torments,
par viodi trop dolç ch'al è
e par stazâ trop ch'al sapuarte il mâl;
condanînlu a une muart vergognose,
parcè che, daûr ce ch'al dîs, Diu lu pararà».
Peraule di Diu.

SALM RESPONSORIÂL

dal Salm 53

A la strafotence e persecuzion dai triscj che a disin: Tindin palissis al just, parcè che nus intrighe, il just al rispuint presentantsi al Signôr e metint la sô cause tes mans di Diu.

Invocazions semplicis che a vegnin dal cûr, colmis di fiducie parcè che Ve, che Diu al vignarà a judâmi. La fuarce di Crist perseguitât, dai martars, di tantis personis umilis che no san dulà parâsi e je in chel fiduciôs e sincêr: Tu sês tu, Signôr, il gno jutori.

R. Tu sês tu, Signôr, il gno jutori.

Se cjantât, Il cjant dai salms responsoriâi, p. 162.

Diu, pal to non dami salvece,
fasimi justizie cu la tô fuarce.
Diu, scolte la mê preiere,
tint l'orele a lis peraulis de mê bocje. **R.**

Parcè che cuintri di me i forescj si son metûts
e une intate e cîr di copâmi;
nol è Diu denant di lôr. **R.**

Ve, che Diu al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non ch'al è bon, Signôr. **R.**

SECONDE LETURE

Jc 3,16-4,3

Ce ch'al ven de justizie al è semenât inte pâs, par chei ch'a fasin opare di pâs.

Gjesù tal vanzeli de domenie XXII nus veve dit: A son invezit lis robis ch'a jessin dal om chês ch'a sporcjn l'om. Di fat di dentri vie, ven a stâi dal cûr dai oms, a vegnin fûr i triscj pinsîrs... (Mc 7, 1-23). Al è ce che nus torne a spiegâ la letare di Jacum di vuê: Dontri vegnino... vois ch'a sbuliin dentri di vualtris.

La letare nus cjacare ancje de sapience ch'e ven di adalt; in plui nus met un griot: cuant che o preais, o domandais malamentri.

De letare di san Jacum apuestul

Benedets, là ch'e regne la gjelosie e il spirt di contradizion, al regne il disordin e ogni sorte di brutis azions. La sapience ch'e ven di adalt invezit e je prime di dut monde; po e puarte la pâs, il biel trat, e lasse cori, e je plene di boncûr e di buinis oparis, cence diferencis e cence falsetâts. Ce ch'al ven de justizie al è semenât inte pâs, par chei ch'a fasin opare di pâs.

Dontri vegnino mo lis vueris e lis barufis ch'o vês fra di vualtris? No vegnino propit des vuestris vois ch'a sbuliin dentri di vualtris? O vês gole e no rivais adore di vê e alore o copais; o vês invidie e no rivais adore di vê e alore o barufais e o fasês vuere. No vês parcè che no domandais; o domandais e no us ven dât parcè che o domandais malamentri, par strassâ dut tes vuestris brutis vois.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI

Mc 9,30-37

Il Fi dal om al sarà consegnât...Se un al vûl jessi prin, al à di jessi il famei di ducj.

Alc, te introduzion, o vin dit de prime part di chest vanzeli; la seconde part e comence: A rivarin a Cafarnao...

Gjesù intant che a jerin par strade al à scoltât e tasût, ma cumò in cjase si sente e al conteste, al rimprovere, e cjapât sù un frut, lu metè tal mieç di lôr.

Significât: un frut al jere cence dirits; cussi la comunitât cristiane e à di radunâsi torator dai piçui, dai ultims, di chei che a son cence dirits.

Chest ategjament di Gjesù mi fâs pensâ che tal progjet des colaborazions pastorâls-foraniis de diocesi i paîs piçui a àn di jessi tignûts in palme di man sei pe raccomandazion di Gjesù di meti i ultims par prins, sei pai valôrs che ancjemò a custodissin in sé, (in particolâr i rapuarts umans che a son la condizion par une comunitât cristiane), sei parcè che li in particolâr si podaran fâ esperiencis di une gnove pastorâl e di comunitâts cristianis diferentis. (Puedje nassi...)

Dal vanzeli seont Marc

In chês volte, Gjesù e i dissepui a levin a traviers de Galilee, ma lui nol voleve che nissun no lu savès. Di fat al jere daûr a inscuelâ i siei dissepui e ur diseve: «Il Fi dal om al sarà consegnât tes mans dai oms, che lu coparan; ma, copât ch'al sarà, dopo trê dîs al resurissarà». Lôr però no capirin chestis peraulis e a vevin rivuart a fâi domandis.

A rivarin a Cafarnao e cuant che al fo in cjase ur domandà: «Di ce cuistionaviso par strade?». Lôr però a tasevin, parcè che a vevin cuistionât fra di lôr sun cui ch'al jere il plui grant. Alore lui, dopo di jessisi sentât, al clamà i Dodis e ur disè: «Se un al vûl jessi prin, al à di jessi l'ultin di ducj e il famei di ducj». Po, cjapât sù un frut, lu metè tal mieç di lôr e, strenzintlu tai braços, ur disè: «Chel ch'al acete un di chescj fruts tal gno non, mi acete me; echel che mi acete me, no mi acete me machel che mi à mandât».

Peraule dal Signôr.

Su lis ufiertis

Acete vultintîr, Signôr, i regâi dal to popul,
par ch'al puedi vê, cui sacraments dal cîl,
ce ch'al professe cu la devozion de fede.
Par Crist nestri Signôr.

Antifone a la comunion

Sal 118,4-5

Tu tu âs dât ordin, Signôr, che i tiei decrets a sedin metûts ben in vore.
Ch'a sedin sigûrs i miei trois
par ch'o puedi meti in vore i tiei ordins.

O ben:

Zn 10,14

Jo o soi il bon pastôr, o cognòs lis mês pioris
e lis mês pioris mi cognossin me, al dîs il Signôr.

Daspò de comunion

Compagne simpri, Signôr, cul to jutori

chei che tu ristoris cui tiei sacraments,
par ch'ò podin sintî i efiets de redenzie
tai misteris e te vite.
Par Crist nestri Signôr.

* * *

Riflession di pre Antoni Beline: **Prins e ultims**

Ju veve sielzûts lui, a so plasiment, e si jere cjatât dapruf une conclave che e jere ce sgrisulâsi. Furtune che al veve tante passience che ur faseve scuele a part, par che ur jentràs amancul alc dal grant misteri che si jerin cjatâts tal mieç cence nissun merit. E problemis and' jere tancj e lu riguardavin lui e ju riguardavin lôr. Il cantin plui grant a riguard di lui al jere chel di viodisal a copâ...

Vanzeli par un popul, an B, p. 159

* * *

Cjants

*Libri **Hosanna**, sot dal titul **Eucaristie**: messe, benedizion eucaristiche, rîts e cjants; dal n.7 al n.62 comprendût.*

* * *

La sielte preferenziâl dai paîs piçui

Un plan pastorâl che al partîs dai ultims nol pò fâ di mancul in Friûl di meti in prime linie, par jessi servîts miôr, i piçui paîs.

In Friûl la sielte preferenziâl pai puars e je la sielte preferenziâl pai piçui paîs.

No voressin che, in non di une logjiche mai metude in dubi, si continui a pensâ che “par furnî l’altâr grant di un domo si puedi sfurnî cualunche altri altâr”; la che i paîs no son altârs ma comunitâts.

O vin tante dibisugne come glesie di metisi su la strade de semplicitât: tai discors, te liturgjie, tai segnos, te dutrine, te sielte dai responsabii, tai rapuarts cu la int, e chest al pò vignînus sore dut di une conversion ai “semplîçs” dal Vanzeli, ai piçui dai paîs.

Che si tegni cont di dut ce che di bon un paîs al à, te fiducie che ogni comunitât e rivi a esprimi i siei responsabii.

Puedje nassi une gnove zornade pe glesie? 13.09.1988

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

* *Par domandâ chescj libris scrivêt a info@glesiefurlane.org*

